

furent delivrez par vne protection du Ciel particuliere. Tous les jours, font des jours de grace & de faveur, pour ceux qui donnent à Dieu leur vie.

Lors qu'ils furent arrivez à l'emboucheure de la riviere, ils drefferent vne petite Chapelle sur vne petite Isle, afin d'y estre plus à couvert des maringouins, ou petites mouches tres-importunes, qui piquent jusqu'au fang, & dont tous les bois sont remplis.

En ce lieu-là, les François & les [71] Sauvages affisterent à la Messe, que le Pere dit de bon cœur, pour remercier Dieu de son assistance en tout ce voyage.

Le lendemain, les Sauvages qui avoient accompagné le Pere, firent leurs devotions; & le Pere leur ayant donné à chacun vn Calendrier, où sont marquez les Dimanches & les Fêtes, pour mieux regler leurs devotions; ils descendirent tous ensemble, pour faire leur pesche de faulmon, dans vne riviere qui est vne journée plus bas.

En mesme temps le Pere & les François s'embarquerent dans vne Biscayonne, & arriverent en deux jours, à l'entrée de la riviere de Piribisticou, où vn vent contraire les arresta.

Ce fut là, où toutes les fatigues du Pere furent abondamment effuyées, par la consolation qu'il receut, à la [72] veuë d'une famille de Papinachois, que la Providence de Dieu luy fit rencontrer. Le Chef, qui en avoit la conduite, & qui avoit esté instruit dès l'année precedente par le Pere, luy ayant promis qu'il se trouveroit sur le bord du grand fleuve, avec sa femme & ses enfans, pour y recevoir le Baptesme, s'acquita parfaitement de sa promesse.